

之不能焉得不為大憂乎夫明者視於無形聰者聽於

無聲誠先於未然即蒙恬樊噲不復施棘門細柳不復

備馬邑之策安所設衛霍之功何得用五將之威安所

震師古曰先於未然謂計策素定禦難折衝不然壹有隙之後雖智者勞心

於內辯者轂擊於外師古曰轂擊言使車交馳其轂相擊也猶不若未然

之時也且往者圖西域制車師師古曰圖謀也置城郭都護三

十六國費歲以大萬計者師古曰財用之費一歲數百萬也豈為康居

烏孫能踰白龍堆而寇西邊哉孟康曰龍堆形如土龍身無頭有尾高大者二

三丈埋者丈餘皆東北向相似也在西域中迺以制匈奴也夫百年勞之一

日失之費十而愛一臣竊為國不安也唯陛下少留意